

Donny contento cu e logro

Solar panel pa Cas di Luz na Seroe Preto a bira realidad

ORANJESTAD (AAN): Cas di Luz na Seroe Preto San Nicolas, cu ta worde maneha door di Hubentud Unie Seroe Preto, ta worde dorna tur fin di aña masha bunita y luhoso. E tradicion aki a bira asina popular den pueblo y pa turistanan.

Aunke costo di coriente y material pa adorno ta bira cada aña mas dificil pa paga, e grupo aki a sigui lucha cu e gastonan halto pero nan a logra mantene e tradicion.

“Durante di temporada di fiesta na final di aña 2011, mi a worde entrevista pa un canal di television y mi a expresa cu lo mi entrega un mocion den Parlamento pa urgi Gobierno pa yuda e fundacion pa instala solar panels na e lugar pa asina yudanan cu e gasto di coriente”, Rasmijn ta bisa.

Durante di tratamiento di presupuesto 2012, Donny a entrega e mocion cu a worde aproba unanimamente den Parlamento pa Cas di Luz haya Solar Panel. Despues e trabao pa logra e proyecto a cuminsa y awor despues di un aña y mey cu Rasmijn a haci su promesa na television, nos ta wak cu e proyecto a worde realiza.

Coriente lo worde genera durante henter aña y lo worde acumula. Fin di aña, ora cu e gasto di coriente ta halto door di e lusnan di adorno y otro artefactonan cu nan tin mester worde usa, e fundacion lo haya e coriente back pa asina reduci of elimina e gasto

halto di coriente. Asina aki Gobierno ta cumpli cu nos pueblo pa asina nos cultura y tradicion por continua. “Mi ta contento cu e proyecto aki a worde realiza. Pabien na e fundacion y henter Aruba cu e logro aki”, Rasmijn ta termina.

